

26/09/2003

Ku Mohd Fozi sahut cabaran Malaysia Boleh

Jaafar Mulup

KUALA PILAH: Usia tidak menjadi penghalang seseorang itu untuk `mengabdikan' diri mereka terhadap sesuatu perjuangan, apatah lagi sebagai tanda penghargaan dan terima kasih kepada seorang pemimpin yang banyak berjasa.

Ku Mohd Fozi Ku Husain, 52, kini bersedia menyahut slogan Malaysia Boleh sebagai tanda menghargai jasa Datuk Seri Dr Mahathir Mohamad.

Walaupun sudah masuk dalam golongan veteran, dia yang mempunyai 10 anak dan seorang cucu, akan berkayak secara solo menyusuri pantai Semenanjung sejauh kira-kira 2,000 kilometer dari Tambatan DiRaja Sungai Kelantan hingga ke Kuala Perlis dengan meredah Laut Cina Selatan, Selat Tebrau dan Selat Melaka.

Dia yang berasal dari Perlis dan `menyemondo' (berkahwin dengan orang Negeri Sembilan) di Johor, kini giat menjalani latihan.

"Saya berdoa supaya dapat berkayak tanpa sebarang halangan dengan membuat sasaran perjalanan selama 22 hari sempena 22 tahun Datuk Seri Dr Mahathir Mohamad menjadi Perdana Menteri," katanya yang menetap di rumah rakyat Johor.

Ku Mohd Fozi adalah anak tunggal pasangan Ku Husain Ku Chik dan Norizan Hashim, dari Kampung Belukar, Arau, Perlis.

Bapanya meninggal dunia pada 1971. Ketika hanyatnya, beliau pernah menyandang jawatan Ketua Pergerakan Pemuda Umno Bahagian Arau, manakala ibunya meninggal dunia pada 1991.

"Sebagai manusia kerdil dan hidup dalam keadaan sederhana tidak ada apa-apa benda yang dapat saya berikan kepada Perdana Menteri sebagai hadiah, saya ingin menyumbangkan kudrat dengan berkayak sebagai menyahut cabaran Malaysia Boleh.

"Saya penuh yakin ekspedisi yang akan bermula pada 1 Oktober ini akan dapat disempurnakan," kata Ku Mohd Fozi.

Bagaimanapun, dia akan berpegang kepada nasihat Perdana Menteri supaya menjaga keselamatan.

"Sekiranya keadaan laut tidak mengizinkan untuk berkayak, saya akan singgah di mana-mana jua tempat selamat. Namun, ekspedisi ini akan diteruskan ke destinasi yang dituju walaupun mengambil masa agak lama sedikit," katanya.

Ku Mohd Fozi yakin hasratnya itu akan berhasil berdasarkan keadaan kesihatan yang baik, kekuatan mental dan fizikal yang stabil. Kini, dia menjalani latihan antara tujuh hingga 10 jam sehari berdasarkan jarak antara satu perhentian ke suatu perhentian yang dianggarkan kira-kira 100 kilometer dan mengambil masa sekurang-kurangnya lapan jam, bergantung kepada keadaan laut.

Sementara isterinya, Norhayati Ibrahim bersama anak dan cucu memberi dorongan kuat supaya ekspedisi ini mencapai kejayaan dalam keadaan selamat.

"Kami sentiasa mendoakan semoga suami saya dalam keadaan sihat," katanya.

Sebagai perangsang, dia akan turut ke Kota Baru bersama rombongan dari kampung bagi menyaksikan sendiri suaminya berlepas daripada destinasi pertama ini.